

新元史

列傳

第一百五十至第一百五十四

第陸拾冊

列傳第一百五十

新元史卷之二百五十三

賜進士出身日講起居注官翰林院侍讀國史館纂修膠州柯劭忞撰

外國五

占城

爪哇

琉求

島夷諸國

占城本秦象郡林邑縣地東濱海西際爪哇南通真臘
北與安南之驩州接壤東西五百里而羸南北三千里
都城去海一百二十里近瓊州舟行順風一日可至其
南曰施備州西曰上源州北曰烏里州領大小州凡三十
有八亦有縣鎮諸名宋淳熙中占城以舟師襲真臘

入其國都慶元五年眞臘大舉復仇俘其主以歸國遂亡其地悉歸眞臘因名占臘其後國王或曰眞臘人或又謂占城恢復云至元十五年世祖旣平宋將有事海外時荆湖行省左丞唆都遣人至占城還言其王舍利咱牙信合八刺麻哈迭瓦願內附詔封占城郡王遣侍郎教化迪總管孟慶元萬戶孫勝夫與唆都同往諭其王來朝十七年國王保寶旦拿囉耶叩南謁占巴地囉耶遣使奉表降兼貢珍物及犀象初朝廷以占城國王孛由補刺者吾稱臣內附命唆都就其國立占城行省撫之旣而其子補的專國不聽命會萬戶何子志千戶

皇甫傑使暹羅宣慰使尤永賢亞闌等使馬八兒國道
占城皆被執事聞命唆都討之兵出廣州航海至占城
港港口北連海旁有小港五通其國大州東南皆山西
傍木城官軍依海岸屯駐蠻兵治木城四面約二十餘
里起樓棚立礮臺百餘又木城西十里建行宮其國王
親率重兵屯守遣都鎮撫李天祐招之七往終不服分
遣瓊州安撫使陳仲達以兵由水路攻木城北面總把
張斌百戶趙達攻東面沙觥省官分二道攻南面舟泊
岸爲風濤所碎者十七八蠻兵開木城南門建旗鼓乘
象拒戰敗之官軍入木城與東北二軍合其王棄行宮

燒倉廩殺永賢亞闌等與其臣逃入山谷遣使者陽乞
降許之官軍入大州王遣其舅寶脫禿花奉國王信物
雜布二百疋大銀三錠碎銀一甕爲質又獻金葉九節
標槍言國王欲來病未能起先使持其槍來以見誠意
復令第四子利世麻八都八德刺第五子舍利印德刺
來見詭言世子補的被傷死王頗中箭未愈故先使二
子來議入覲事以欺我師省官疑非真王子聽其還遣
千戶林子全偕往覘之二子在途先歸子全入山兩程
國王遣人來拒不果見又殺何子志皇甫傑等百餘人
寶脫禿花俄又至自言我祖父伯叔皆爲國王傳至我

兄李由補刺者吾殺而奪其位我實銜之願禽其父子以獻請給大元服色唆都不虞其詐賜衣冠撫諭而行有居占城唐人曾延者來言國王逃於大州西北鴉侯山詣交趾真臘闍婆諸國借兵未至懼唐人洩其事將盡殺之延等覺而逃未幾寶脫禿花偕其宰相報孫達兒及撮及大師等五人來降省官引曾延與見寶脫禿花曰此姦細也國軍皆潰散安敢復戰且今未附州郡凡十二處每州遣一人招之無不服者唆都猶信其言遣子全等同赴大州比至城西寶脫禿花背約間行自北門乘象去萬戶張顒等領兵赴國王所棲之地近水

城二十里賊浚濠塹拒以大木官軍斬刈超距奮擊轉戰至木城下山林阻隘不能前蠻兵旁出截歸路官軍殊死戰得脫朝廷更命阿塿海發兵萬五千人船二百艘助討以安南道阻不果至又命萬戶忽都虎烏馬兒率江淮軍二萬人赴唆都軍前而唆都已回軍忽都虎等至占城知官軍退令百戶陳奎招其國王來降其王遣阿不蘭納欵具言被官軍刼掠貧無以獻俟來年當備物令嫡子入朝未幾果遣其孫濟日理勒蟄奉表歸順朝廷未知也再命鎮南王脫歡發兵假道交趾征之國王乞回軍願出土產歲修職貢使大盤亞羅日加翳

大巴南等十一人詣闕獻馴象並賀聖誕節舊州主寶
嘉婁亦奉表入附自是終元之世貢使不絕英宗至治
三年遣其弟保佑八刺遮貢方物泰定帝致和元年遣
使來貢兼言屢爲交趾所侵帝下詔和解文宗至順三
年遣其臣阿南那那里沙等奉金書表入貢惠宗後至
元元年遣使獻方物且言交趾遏其貢道詔遣使開諭
其所貢雲龍形通犀帶菩薩石薔薇水猛火油皆貯瑠
璚餅中以進有火珠大如雞卵正午承日影取艾燃之
立見火其王每坐見官屬一膜拜卽起白事事畢復一
膜拜而退親近之臣見王跪疏遠者拱手而已王腦後

鬢髻散披吉貝衣或大食錦或川法錦大衫戴金花冠
七寶裝瓔珞爲飾脛股皆露紅革履無襪男子以白氎
布纏胷下垂至足衣袖甚窄撮髮爲髻散垂餘髻於後
婦人亦腦後撮髻無笄梳其服飾與男子同人多乘象
食山羊水兕國無城郭無絲蠶有米粟豆麻每歲稻熟
王自刈一把從者及羣婦女競刈之其王或以兄爲副
王或以弟爲次王設高官八員分掌東西南北各二無
奉祿所管土俗資給之別置文吏五十員有郎中員外
秀才等管資儲寶貨又司帑廩者十二員主軍卒者二
百餘員皆給龜魚以充食免其調役而止其大姓號婆

羅門兵萬餘人月給秬米二斛歲給布三五匹王乘木
杠四人舁之從者十餘輩一人執檣榔杵合前導樂有
胡琴笛鼓大鼓樂部亦列舞人兵器則刀槍弓矢手牌
夜卧惟王有床諸臣則施地蓐以十一月十五日爲冬
至相賀十二月十五日祀天縛木爲塏王及官民用衣
物香藥焚其上州縣各以土產獻王人有疾病采生藥
服食地不產茶飲椰子酒刑小過以藤杖當死者標槍
抉其喉或令象蹈之或以鼻捲撲皆馴習隨人意世與
交趾相惡數攻殺兩國使者並至則分東西賜宴朝則
交人入垂拱殿占城趨紫宸以避若誓不相見者占城

屬國曰賓章龍卽佛書之舍城其地與占城相連

爪哇在海外視占城益遠其名爲諸史所不載自泉南航海者先至占城而後抵其國世祖出師海外惟爪哇之役最大自至元十七年始降旨招諭其國二十三年遣必刺蠻等至爪哇自是通使往來無間後遣孟祺持詔往國王刺其面遣歸帝怒決意伐之二十九年二月詔史弼高興亦黑迷失並爲福建行省平章會福建江西湖廣三省兵凡二萬發海舟千艘齎糧一年降虎符金符銀符以百計用備功賞大軍會泉州自後渚啟行風急濤湧舟掀簸士卒數日不能食過七洲洋萬里石

塘厯交阯占城界明年正月至東董西董山牛崎嶼入
混沌大洋橄欖嶼假里馬答枸闌等山駐兵伐木造小
船以入遣宣撫官楊梓全忠祖等帶五百餘人先往慰
諭大軍繼進弼等至爪哇之杜並足議分軍水陸進攻
弼率都元帥那海等水軍自杜並足過戎牙港口至八
節澗興與亦黑迷失帥馬步軍自杜並足陸行遣副元
帥土虎登哥等乘鑽鋒船由戎牙路至麻喏巴歇之浮
橋時爪哇方與隣國葛郎構怨其王爲葛郎酋哈只葛
當所殺其壻土罕必闍耶攻葛郎不勝退保麻喏巴歇
聞弼等至以其國山川戶口并獻葛郎國地圖納降先

令楊梓全忠祖引其宰相昔刺難答吒耶等五十餘人
來迎大軍會八節澗澗上接杜馬班王府下通莆奔大
海乃爪哇咽喉要地其謀臣者希甯官沿河泊舟楫觀
望成敗再三招之不降乃於澗邊設偃月營留萬戶王
天祥守河津土虎登哥等水陸齊發者希甯官懼棄船
宵遁獲鬼頭大船百餘艘令都元帥那海等鎮八節澗
海口大軍方行土罕必闍耶遣使詐稱葛郎主追殺至
麻喏巴歇乞官軍救援亦黑迷失信之先遣都元帥鄭
鎮國引軍赴章孤援之高興抵麻喏巴歇却稱葛郎兵
未知遠近興回至八節澗尋報賊兵夜當至興仍赴麻

喏巴歇未幾葛郎兵果三路來攻亦黑迷失率萬戶李明迎賊于西南不遇興與萬戶脫歡由東南路接戰殺傷數百人餘賊奔潰山谷俄西南路賊奄至興再戰至晡又敗之乃分軍三道伐葛郎土虎登哥將水軍沂流而上亦黑迷失由西道興等由東道士罕必闡耶以本軍繼其後期會答哈城葛郎國主將兵十餘萬拒敵三戰賊敗潰擁入河死者亡算進圍其城是夕哈只葛當出降並俘其妻子土罕必闡耶求歸具降表兼貢所獲珍器遣萬戶捏只不丁甘州不花率兵護送之至中途殺二使叛去且合衆來攻弼等且戰且行三百里得登

舟行六十八日夜達泉州士卒亡者三千餘人帝怒弼等玩寇無功各杖之成宗大德元年爪哇國遣舍刺班直木達奉表乞降始授宣敕元貞元年來獻方物仁英兩朝皆遣使賀天壽節泰定二年亦奉表入貢致和元年詔優護爪哇國王札牙納哥仍賜衣物弓矢文宗至順三年遣其臣僧伽刺等奉金書表以獻惠宗至正二十三年遣使澹濛加伽殿來進方物帝賜其王三珠虎符及織錦文幣其地平坦宜稻麻粟豆不產茶煮海爲鹽出金銀犀牙箋檀香茴香亦務蠶織室宇壯麗多飾金碧剪銀葉爲錢其酒出蝦蟇丹樹甚香美其俗有名

而無姓王則椎髻戴金鈴衣錦袍躡革履坐方牀官吏
入謁三拜而退國人見王出則坐俟其過乃起以爲敬
也

琉求亦海中島也當泉州東水行五日而至其王歡期
氏自隋時王名渴刺兜始見於史國人呼王爲可老羊
妻曰多拔茶所居曰波羅檀塹柵三三重環以流水樹
棘爲藩土無賦歛有事則均稅用刑無枷鎖縛以繩死
刑以鐵錐尺許入其頂殺之俗無文字望月虧盈以紀
時候草榮枯以紀歲人深目長鼻有小慧男女皆以白
紵繩纏髮從項後遶盤至額男去髭鬚烏羽爲冠裝以

珠貝簪以赤毛形製不一婦人黥手蟲蛇文以羅紋白布爲帽土產多鬪鏤樹似橘葉密條纖絲下垂織其皮并雜色紵可爲衣綴毛垂螺爲飾雜色相間下垂小貝聲如珮環懸珠於頸編藤爲笠出入必戴之有刀稍弓箭劍鍔之屬鐵刃皆薄小以骨角輔之組紵爲甲或用熊豹皮王出則乘木獸輦之而行人驍健善走好格鬪耐創而難死收鬪死者祭神羣聚食之以鬪體告王王則賜之冠使爲隊帥王所居壁下多聚鬪體土宜稻梁黍豆以石爲鍾火耕水耨氣候與嶺南相類無牛羊驢馬煮海水爲鹽釀木汁爲酢米麪爲酒食皆用手凡宴